

Segun Consejo Electoral, 69,824 persona tin derecho di vota dia 6 di december

Ayer atardi a tuma luga e prome conferencia di prensa di Consejo Electoral di Aruba pa asina comparti algun informacion importante relaciona cu eleccion di dia 6 di december den cual 69,824 persona ta bay tin e derecho di scoge nan candidato politico faborito e dia ey.

Grasita Griffith presidente suplente di Consejo Electoral ken a ser apunta pa presidente di Algemene Rekenkamer, Sharine Luidens hoofd di Registro Civil y Censo y alabes miembro consultativo di Consejo Electoral, Sahaira Kelly ken ta fungi como secretario di Consejo Electoral y Rossy Marchena ken ta presidente di Consejo Electoral a trece dilanti varios topico pa loke ta trata eleccion di dia 6 di december manera hoofdstembureau Consejo Electoral.

Riba e topico aki, Marchena a sigura cu durante eleccion Consejo Electoral ta fungi como hoofdstembureau, e cual tin diferente competencia, entre otro, entrega de lista di candidato de partidonan politico, investigacion di validez di e listanan, determinacion di validez di e listanan, numeracion di e listanan y asignacion di color, determinacion di resultadonan di eleccion y tambe preparacion di gelfoofsbrieven.

Marchena a sigura cu Consejo Electoral ta un organo independiente di Gobierno y Parlamento di Aruba, ta responsabel pa un eleccion husto y transparente "su mision ta pa promove confiansa di ciudadano den proceso democratico y garantiza integridad di cada eleccion," manera el a señala.

Consejo Electoral ta consisti di 6 miembro aparte di presidente, presidente suplente y e miembro di consultoria, cada un di nan ta ser apunta pa un di e tres partido mas grandi of un di e tres partido cu a haya mas voto durante ultimo eleccion na 2021 cual ta e partidonan MEP, AVP y Raiz. Esnan apunta pa e partidonan aki ta Manolo Giel, Desiree Croes y Marlon Jansen. Cada un di nan tin un suplente.

Registro Civil y Censo tin un



tarea hopi importante, Censo ta encarga cu e logistica di eleccion, por ehemplo, ta zorg pa e registro di esnan cu tin derecho di vota, ta percura pa tin stembiljet y e carchinan di vota.

Pa loke ta trata comision finanzas di partido politico, Marchena a sigura cu e comision ta ser forma pa presidente, presidente suplente di Consejo Electoral y maximo 3 experto riba tereno di accountancy. E comision finanzas tambe ta funciona independientemente di Gobierno y Parlamento e cual tin como tarea e supervision riba e finanzas di partidonan politico registra y candidatonan pa miembresia di parlamento y reporta esaki tambe.

Tur aña un parti di un partido politico mester entrega na comision finanzas un reportahe anual cual tin cu bay acompaña di un rapport financiero. "Algo nobo pa e eleccion aki, ta bay ta registracion continuo y sistematico di tur donacion cu e partidonan politiconan registra y e candidatonan cu ta participa na eleccion tin cu tene y entrega na comision di finanzas," Marchena a bisa.

Partidonan politico por haya hasta 50,000 florin di donacion

Un donacion ta tur placa ricibi directa of indirectamente, producto of servicio ricibi cu tin valor, sin cu a paga of no completo pa esakinan.

Prome cu eleccion partidonan politiconan y candidatonan cu ta participa mester entrega un parti di e registracion di e donacion, despues di

eleccion nan mester entrega e otro parti di e registracion.

Un persona, compania of organizacion por haci donacion di maximo 30,000 florin na un mesun partido politico y maximo 20,000 florin na e mesun candidato den un aña calendario, total 50,000 florin por ricibi di donacion.

Ken ta elegibel pa vota dia 6 di december?

Grasita Griffith a splica cu personanan cu por vota ta personanan cu 30 dia prome cu e fecha di entrega di lista di candidatonan di partidonan politico, esta 18 di september 2024, ta registra den Registro Civil y Censo di Aruba, nan mester tene e nacionalidad Hulandes y pa e dia di votacion mester tin 18 aña di edad bay ariba.

69,824 persona por vota pa dia 6 di december, pa dia 28 di november ta e ultimo dia pa votadornan ricibi nan oproepingskaart. Ta conseha pa votadonan tin nan adres corecto registra na Censo pa nan por ricibi nan carchi pa vota.

Entregamento di lista di candidatonan di partidonan politico

Esaki ta bay tuma luga diabierna awor 18 de october, for di 9or di mainta te cu 4or di atardi. E lista por ser entrega di manera digital of personal na hoofdstembureau. Pa e proceso aki bay na un manera ordena y transparente a duna e partidonan cu ta desea di entrega nan lista di candidatonan personalmente e oportunidad pa por a saca lot y asina stipula e orario di entrega di lista di candidatonan.

Un total di 10 partido politico a participa den e loting, e otro nan cu a participa por entrega nan lista di candidato riba un di e orarionan cu ta habri ainda of por entrega e lista di manera digital.

Partidonan politico cu no a logra un asiento durante ultimo eleccion pa participa na Parlamento na 2021 mester ricibi sosten y firma di nan lista di minimo 586 persona, loke ta representa 1% di e votonan valido durante ultimo eleccion na 2021 (58,610 voto).

Fecha pa sostene un lista di candidatonan lo tuma luga for di 21 te cu 29 di october.

Asignacion di colornan di partidonan politico

Dia 13 di november lo tin numeracion di listanan politico y asignacion di color na e listanan politico pa haci uso di color riba stembiljet. Den un decreto ministerial a stipula cua ta e colornan cu por ser usa: bruin, blauw cla, blauw scur, geel, berde, shinishi cla, shinishi scur, orañ, orañ cla, cora, ros cla, magenta, biña cla, biña scur, kaki, blanco y berde oliva.

Partidonan cu a participa den eleccion anterior, ta haya preferencia pa scoge e color cu nan a usa durante eleccion anterior.

Tin un total di 70 urna electoral

Griffith a informa cu tin un total di 70 urna electoral y dos bijzonder. Cada urna ta consisti di tres miembro di e cual un ta presidente di e urna, alabes por lo menos dos miembro suplente ta ser nombra,

es decir mester di un total di 360 miembro. Miembro di e urnanan mester ta personanan cu tin derecho di voto.

Campaña di Conscientizacion di Consejo Electoral y slogan di eleccion aki

Consejo Electoral lo tene un campaña di conscientizacion pa informa y educa ciudadanonan referente eleccion y importancia di nan participacion den e proceso democratico, educa ciudadanonan tocante funcionamiento di sistema electoral y stimula participacion mas halto den eleccion.

Nan lo haci uso di diferente plataforma digital y nan website incluyendo rednan social manera Facebook y Instagram.

Slogan di eleccion aki ta lo siguiente: Sea Informa, scoge y vota.

